

PKR fail RUU persendirian pecat Najib sebagai menteri kewangan
The Malaysian Insider
Sept 15, 2015

PKR hari ini memfailkan rang undang-undang (RUU) persendirian di Parlimen bagi memecat Datuk Seri Najib Razak ekoran tindakan terbarunya yang dijangka akan menambah hutang negara.

Ahli Parlimen Pandan Rafizi Ramli berkata, langkah itu dibuat susulan pengumuman Najib yang ValueCap Sdn Bhd, sebuah syarikat berkaitan kerajaan, akan membelanjakan RM20 bilion bagi membeli saham dalam bursa bagi merangsang pasaran saham.

"Sehingga kini, rakyat tidak dimaklumkan dari manakah dana RM20 bilion ini akan diperolehi untuk disuntik ke dalam ValueCap.

"Umum mengetahui kerajaan Malaysia berdepan dengan defisit belanjawan sejak 1999 dan tidak mungkin mempunyai ruang fiskal untuk memperuntukkan sejumlah RM20 bilion bagi tujuan yang diumumkan semalam.

"Remedi sebenar kepada masalah ini adalah menyelesaikan krisis kredibiliti yang terpalit dengan perdana menteri," katanya sambil memaklumkan beliau memfailkan satu RUU persendirian hari ini bagi menghalang orang yang sama memegang kedua-dua jawatan menteri kewangan dan perdana menteri.

"Hanya dengan peletakan jawatan Najib sebagai menteri kewangan barulah Bursa Kuala Lumpur ada harapan untuk pulih," katanya dalam satu kenyataan.

Menurut Rafizi, ValueCap adalah sebuah syarikat pelaburan saham yang dimiliki secara sama rata di antara Khazanah, Permodalan Nasional Berhad (PNB) dan Kumpulan Wang Amanah Persaraan (KWAP).

Katanya, semakan beliau juga mendapati, penyata kewangan bagi tahun kewangan berakhir 31 Disember 2013 menunjukkan, ValueCap mempunyai aset yang boleh dicairkan sebanyak RM3 bilion sahaja.

"Maka, untuk menyediakan dana sebanyak RM20 bilion bagi membeli saham-saham yang jatuh kerana sentimen pasaran yang lemah, ada kemungkinan besar ValueCap terpaksa menerbitkan bon yang besar.

"Ini bermakna sekali lagi Najib menggunakan dana rakyat untuk berhutang bagi tujuan menutup kelemahan pentadbiran beliau.

"Sekiranya ValueCap menerbitkan bon bagi tujuan mendapatkan dana RM20 bilion ini, ia samalah seperti mendedahkan Khazanah, PNB dan KWAP kepada risiko hutang sebanyak RM20 bilion," katanya.

Najib semalam mengumumkan beberapa inisiatif yang disifatkan kerajaan sebagai

langkah proaktif bagi merancakkan ekonomi negara.

Beliau antaranya turut menyeru syarikat Malaysia di luar negara agar melaburkan semula keuntungan mereka ke dalam negara bagi merancakkan ekonomi tempatan.
– 15 September, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/pkr-fail-ruu-persendirian-pecat-najib-sebagai-menteri-kewangan>